

## FAJUUMENUMI SIDRUWAAS SATI ANAU

WANDOMI :

Yíneni aat mati fajaaf fati anau di sidruwaas soola, san umaje sirere di saasu ban poop sisofut di uceen soo silakom fujuumaf fati di malegenam, di kairaay di dúniaay búrom ;

Yíneni jaat anau nasonsoḡ mati kàmanjaataak di eñoosey sidruwaas sati anau soo siḡarulomi màkojiam, ban malegen munkul mujawulojaw di dúniaay man Anoosan muḡoolengoolen usanken man súumimi nusof man súumimi, nupak di màkooleniam di bugaalab ;

Yíneni jaat mati sensen man aakemmi mofam apooy sidruwaas sati anau, takumḡarul anau tuuñool eri manakaan wajakut ;

Yíneni jaat mati kàligen bapaalaay bati síukas jajak;

Yíneni jaat di kabaatak kati dúniaay búrom, bukanak kulanlaañ kúyiisen mankusofumi sidruwaas sati anau di fajaaf fati anau di malegenaam mati anan di kare'enak búrom aniine di aseek ban poop kujunjuum burok man mati anau mujaw fáculey;

Yíneni jaat mati síukas sàndomi soo di "Organisation des Nations Unies" sijunjuum ejuum yati sidruwaas sati anau di dúniaay búrom sikaani.

Yíneni jaat mati sidruwaas sati anau kankan waaf wáamak wáriinge ejuum man wasankeníña ukaani.

Asambule Seneraal

Esosof mati furimaf ufe fujuumenumi sidruwaas sati anau kankaamn waaf wajake máamak bee bukanak búrom di síukas búrom. Moo kaane jajak man bukanak di síkafaas kujuum mankuligenufo di kúyiisenufo kuñiilak ñatimkaraj mukaanaam moomu búrom eñesey maapi kaanimi man dúniaay búrom éyinen di ekaan siluwaas soosu nen mansiregumi eeno.

Fujuum 1

Bukanak búrom nan kuwolimi kurere kererer di waafaw búrom. Kubabaj poop býejet di karampenoor.

Fujuum 2

Anoosan nababaj sidruwaas soosu búrom; bajut aseek bajut ániine, bajut an ati kansanken kúbuto, bajut an ati kapongol kúbuto, bajut paarti ébuto, bajut an abaji di muceen benen bajut ró kápajul kuceen kati pólitik kati luwa mba kati ésuk, yabaje fajaaf fooliyo mba ebajut.

Fujuum 3

Anoosan nababaj druwa ebaj fuyiifaf foola, ebaj kapooy kati fajaaf fool a di kaano nen man amanumi eeno.

Fujuum 4

An letalako amiikeel ati akeen, letarok bee akeen; ban poop miikeliyaay di kanoomen kati kumiikeel firenifiren.

Fujuum 5

Bajut katoorandig an; an létassuutukeni.

Fujuum 6

Anoosan oomu di druwaay yoola banooban ban ammi.

Fujuum 7

Luwaay ere'en re'en bukanak búrom anoosan nababaj kapooyak kákonak kati luwaay. Anoosan nababaj kapooy mba mukaanaay máluse furimaf ufe.

Fujuum 8

Anoosan nuḡoolengoolen ulamandi furim mba mukaanaay máluse sidruwaas soosuña san umanjumi luwaay eseneso.

Fujuum 9

An letuḡoolen ulaaf an manusofool, nukulool mba nukesoool.

Fujuum 10

Anoosan nubabaj druwa káyiisen di bantabaay wabajimi tiribinaal yan umanje elaañut di anoosani yooyu eje'em bee efeley.

Fujuum 11

Luwaay yoone an anoosan kurege oo akaane mátaaḡiye kulaafoolaaf bee funakaf fati kíitiyey yíiseni jaat wakaanumi mankoone akila akaane oo babajerab kujuumak koola.

An leekukulool mati waaf wan umanje nan ukaanumi ulakout wátaaḡiye di luwaay di poop an letakaanool saariyong yawuuje yawarin ekaani.

Fujuum 12

An uwarut unoken di mukaanaam mati an, síndaay yati an, mba tan tati an mba nuyenten fajaaf foola mba nukajen kajamaak koola. Luwaay epoopooy anau di waafaw búrom.

Fujuum 13

An anoosan nababaj druwa ejaw ban súumoomi di ekin ban súumoomi di ésukey yoola.

Anoosan nababaj druwa épur mof haani moola di elaañul nan súumool.

Fujuum 14

Nan táaḡimi anoosan nuḡoolene ujaw úgongoto do mof múbuto.

Letuḡoolen ubaj kágongoto kukila lako jaat nububuj an.

Fujuum 15

Anoosan nubabaj druwa ebaj mof miiya.

An letarḡoolen áfiren an méé ebaj mof moola mba épur di moo.

Fujuum 16

Akambaani di ajaja káriinge býebo Kuḡoolengoolen kuyaboos mankubaj kuñiil bápajuloorut sisiw mba síuk mba buḡarab. Kurere di kayaboosak di býebaab di ebaney yoolibo.

Býebaab mambukaan, kuyabooraak kujamoor.

Bukanak kakinum di kaakemmi mofam kuwawar kupooy fiilaf falakomi fufaaraf fati kalakaak.

Fujuum 17

Anoosan, nababaj druwa ebaj waaf woola fúko'ol mba wan kunampoore di kupaalool.

An letugoolen ubot fubaj fati ata fo di mée.

Fujuum 18

Anoosan wuniwun, manubaj kawonoor kiiya, ejuk yíiya di buɗar biiya, súumi jaat nuɗoolene úruuɗ mba núje'etum buɗarab biiya tiyaɗaraay nen man buccerɗum eeno.

Fujuum 19

Anoosan nababaj druwa, ebaj kawonoor kiiya di káyiisen ko nen manumaɗumi eeno. Yoo elakomi an awarut ajaakali ebaj siwonoor soola. Naɗoolenɗoolen ayab kurim mba siwonoor san aɗoolene afasiken dóo ésukool mba tiyaɗ.

Fujuum 20

Druwaas ewuwun anoosani manajuumen kámit mba káfa yati kásuumaay.

An letugoolen unoken an di káfa yanamaɗut.

Fujuum 21

Anoosan nuɗoolenɗoolen ulako di fujuum fati mukaanaam mati mofam miiya mba nubaj kan úfojule kaje'e beet ejuumi.

Anoosan nuɗoolenɗoolen ubaj fujuum di mukaanaam mati mofam miiya.

Kamaɗak kati bukanak koo kukiimi sembaay yati kaakemmi mofam. Kamaɗak kukila woteey éyiisenemi ko. Moo kaane woteey ekila ewawar ebaj waati di waati.

Fujuum 22

Anoosan tan ukinumi sensen manubajuto kayeraay yoola. Kayeraay yooyuña éjowumulojowum di sidruwaas sati fubajaf di sati tan akinumi di sati mukaanaam moola. Kayeraay yooyu an aɗoolent ábajaatiyo; moo kaane ésukoo ésuk enampoonampoor di síruk saasu man kayeraay yooyu ekila ebajo.

Fujuum 23

Anoosan nababaj druwa ebaj burok básuumoo.

Bajut aseek bajut ániine anoosan aroke burok nababaj druwa mankucaamool bacaam bare'e nan burokab banakaanumi.

Anoosan ammi di burok kuwawar kucaamool yaj managoolen acookoor síndaay yoola, naɗoolen abaj kayere di faɗaaf foola.

Anoosan nababaj druwa kajuumen fuɗum fati kurokaak, naɗoolenɗoolen en poop ánokendo mankumak aajaay.

Fujuum 24

Anoosan nababaj druwa ebaj kunak kati kayoolo, kati fúraar. Waatay yati burokab ewawar erewoor ban di ebaj waati yati kayoolo ban pankucaam bukanak.

Fujuum 25

Anoosan nababaj druwa wákoyume bee akila, bukanak koola, furiaf waɗaw di tan akinumi wawar jak. An másuumaati mubaje nen kásumut nen an ataal ájime mba an eluupool efumoe. Bukanak kuwawar kurampenool.

Mudeenanaam di kuñiilak kuwawar kubaj kákaanum di karampen káamak. Kuñiilak búrom "Kabaji di kayaboore mba kayaboorut" kure'e. Koo búrom kuwawar kubaj kacookoor kajake.

Fujuum 26

Anoosan nababaj druwa kakaraɗ an awarut acaam kakaraɗ. Añiil nawawar akaraɗ bacaamut waafowaaf kakaraɗ kati siteginikas di kati burok kuwawar kúkambuli di bukanak búrom. Silekoolas sáamakas poop bajut káfajul.

Nafaay yati kakaraɗak yoo eenom majakaam mati anau di faɗaaf foola. Kakaraɗ kujunjuum fujuum fati epooy sidruwaas sati anau; yoo yákoney ebenenbenen bapaalaab di mof majuupoe di tutooraay yati mof majuupoe di sisiw sajuupoe di bukan kanaamut di uɗar di wanoosan wakaanimi man kayeraay elako di dúniaay.

Kubajaak kati kuñiilak koo koote kanoken kuñooliil di kakaraɗ kan koo kumanguumi.

Fujuum 27

Anoosan nababaj druwa ekaan mukaanaam mati bukanool, nañes mammujaw fácul mammunafaool.

Anoosan ajoonene waaf mba naciik waaf, luwaay ewawar eppooyuwo.

Fujuum 28

Anoosan nababaj druwa man majoone mulako di mofool di dúniaay maje'e bee ekaan man siluwaas sammi di kaytak uke siɗoolen sirok jak.

Fujuum 29

Anoosan nawawar anafa kan kukinoorumi, bukoo keb kuɗoolene kurampenool man moola muɗaw fácul.

Man kakinoorak kúsuum, babaj luwa yajuumeni mati mati manemat sidruwaas soola di mukaanaam mati bukanak an anoosani sidruwaas soola di majakaam moola murelore tan maamu mati aamu mutoorɗumi.

Sidruwaas di siluwaas san ujukulaaña siwarut sípur di wan sísukas sati “Nations Unies” sisofumi.

Fujuum 30

Waaf úleero di kayitak uke wan umanje an mba bukan mba mof muɗoolenɗoolen mújowum to mammukajen sidruwaas di siluwaas sándomi kayitak asambule seneraal yati óni éyinenyinenuko eban di épurenuko di burokab booliyo n° 217 (III) bati fuleegafu fati desambuur nan fubajumi kunak uñen di emitey 1948.